



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :  Tir Yimym

 tir_yimym

 tir yimym

TAPAK 8

National Conference-i
Jantar Mantar nung longkak aittsü

FIFA World Cup 2026: France-i Morocco
tsükdakja semi-finals tongogo



VOL. XXIII ISSUE NO. 268 (ADOK 268)

DIMAPUR

KÜPTOKNÜ (SATURDAY)

CHITENI (JULY) 11, 2026

₹ 5.00

Manipur nung Naga civilian trok tepsetba atema 2 apu



Imphal, July 10, 2026 (Agencies):

National Investigation Agency (NIA), Central Reserve Police Force (CRPF) aser Manipur Police külem telok kati Kangpokpi district nung nisung ana puogo. Naga civilian trok apuba aser tepsetba ken o dak sendakba nung tena apu ta osang angazüker.

May 13 nü nisung tepsetba nung densema alirtem aliba osang tejangja angazükba sülen Hokolbarnep züngia Leilon Vaiphei yimtsüng mita ao aser idangji nisung ana apu.

Tena ya Pradip aser pa kinungsü Ayingbi na ta jangjaogo aser tenaprong Leilon Vaiphei village nung alir.

"Osang tejangja angazükba nung ajemdaker Manipur Police, NIA aser CRPF joint team kati

May 13, 2026 nü Leilon Vaiphei village nung Naga nunger trok tepsetba nung shilem agir nisung ana aputsü atema operation tenzük" ta Manipur Police-i metetdaksü.

Naga civilian trok ya May 13 nü pur aoba sülen June 11 nü Kangpokpi district nung arem ka nung tepseter lia angu.

Külen, Naga Students' Federation (NSF)-i Brihostibarnü President Droupadi Murmu dang Manipur nung mepetemsü mapang tai maketba Naga civilians nem temeten agütsüsü aser kümzüka ayutsü mepishiogo.

NSF-i Nagaland Governor ajanga India President dangi memorandum ka züluba nung Naga civilian trok pur aoba, reshikangshiba aser tepsetba atema temeten meshiogo.

Governor Yadav-i Integrated AYUSH Hospital semdang

Dimapur, July 10, 2026 (TYO): Nagaland Governor Nand Kishore Yadav-i July 10, 2026 nü Chedema nung AYUSH Hospital semdangogo.

Iba mapang Governor Yadav-i doctors, nurses, paramedical staff aser tanga ketdangsürtem den ajuruteba sensaksema liasü.

Governor-i healthcare mapa inyakerkem dang healthcare services tajungba agütsüba atema tenüngsang agütsü.

Iba mozü kidang inyaker ajaki iba reju ya Nagaland nung alirtem asoshi taneptsü aser teimla angudak kümdaksüba atema tenüngsang agütsür ta paisa ashi.

Integrated AYUSH Hospital ya March 4, 2022 nü lapok aser linük nung mozü ki tasembuba lir. Iba ajanga sorkari holistic aser integrative healthcare ajungkettsü tenangzükba sayur ta Governor Yadav-isa ashi.

COVID-19 wara mapang iba mozü ki ajanga tongti shilem agia liasü aser ibaji Nagaland nung mezüngbuba designated COVID-19 Hospital inyakba liasü. Alima nung tayongzükba tulu ajuruba mapang iba mozü ki ajanga healthcare services tongtipang agüja liasü ta Governor-isa metetdaksü.

AYUSH system ya kanga

tongtipang lir aser iba ajanga modern healthcare den preventive care, holistic wellness aser healthy living nung yariteper. Integrated AYUSH Hospital ajanga accessible, affordable aser patient-centric healthcare services agütsür ta paisa ashi.

Iba senden nung ketdangsürtemi 50-bedded Integrated AYUSH Hospital indang osang lemsatap.

Iba hospital ya March 4, 2022 nü Union Minister of AYUSH Sarbananda Sonowal-i lapokja liasü. Iba hospital ya Razha Chedema nung lir aser temeket yimtsüng 8 nung alirtem yarir.

Integrated AYUSH Hospital nung medicine system asem- Ayurveda, Yoga & Naturopathy, aser Homoeopathy lir aser staff 43 lir ta ketdangsürtemi Governor dang ashi.

June 2026 tashi nung iba hospital nung OPD consultations 10,050 aser in-patients up 560 yariogo ta ketdangsürtemisa ashi.

Iba hospital ajanga Ayurveda & Homoeopathy mozü angati agütsür, jenjang dalang agi laboratory services agütsür, Panchakarma therapy, naturopathy treatment, clinical yoga sessions, aser emergency care agütsür.

NBCC-i CM Rio dang FCRA Amendment Bill anema ola adoktsü ayongzüker

Dimapur, July 10, 2026 (TYO): Nagaland Baptist Church Council (NBCC)-i Foreign Contribution (Regulation) Amendment Bill, 2026 magizükba metetdaksüogo.

Chief Minister Neiphiu Rio-i Centre den iba onük lemsateptsü ayongzüker kechiyong iba Act ajanga arogotem, Khristan rejutem aser tenla agüja inyakba teloktem dak kanga mejungi kongshitsü ta NBCC memorandum ka zülüogo.

State sorkari iba Amendment Bill anema noktaksüla. Senotsü tashishitsü melii amshitsüba aser national security asoshi bilemstsüba ya tim dang saka iba Bill ajanga chichiba tamangba yimsü dak sendakba teloktem madak "excessive restriction" alitsü akok ta NBCC-i CM Rio dang shiogo.

NBCC nung Baptist associations 21, associate members 4, congregations 1,626 aser baptised members 7.48 dena lir. Nagaland nung arogotemi küm 100 tema sorkar den yaritepa education, healthcare, peacebuilding, disaster relief, youth & women's empowerment, de-addiction

programmes aser services nung yaritepa arur ta parnokisa metetdaksüogo.

Ozüngi melaba ama foreign contributions aruba ajanga ministry temi maparen balala inyaka arur, talisa meta talang pilar alidak aser rongsenketzüng tsütsü tangar memenepertem yarir ta NBCC-isa metetdaksü.

FCRA Bill, 2026 ajanga arogotem aser tenla mapa inyakba rejutemi timleni aruba foreign contributions agizükba nung tenokdangtsü agütsüsü akok, arogo tilatem & grassroots ministries nem compliance burdens talila agütsüsü, global Christian organizations den tesentaktep raksatsü aser tanurtem, tetsürtem, persons with disabilities, teintet rogotem aser sensakertem ajangzüksü atema inyakba mapatem nung kongshitsü ta parnokisa CM Rio dang ashi.

Iba Act ajanga telok ka indang FCRA registration agienra bangdakpurtemi iba telok indang rongsen madak kibur akümtsü ana nung lir ta NBCC-isa metetdaksüogo.

Kerala Legislative Assembly-i Centre sorkar dang amendments

meyipa agütsü ayongzükba ama Nagaland state sorkar aser state Assembly-i iba mesükba bangzüng renemtsü ayongzüker ta parnokisa ashi.

Arogotem ya tamangba yimsü rejutem dang masü saka foundational social institutions lir aser Nagaland nung shisalayimba, sobaliba aser meimchir tsütsü temelenshi bentsür aruogo ta NBCC-isa metetdaksü.

Item amendments ya linük temzüng tsütsü jungjunga reprangdangtsüla kechiyong Arlla 25, Arlla 26, Arlla 29, Arlla 30, aser Arlla 371A ajanga iba temeten agütsür. Nagaland state sorkaria iba Act ajanga Naga nunger tamangba yimsü aser lokti rejutem dak kongshir asü masü asadangtsüla. Nüngdakra state sorkari Centre dang amendments reprangshiang ta rongshitsü akok mesüra okadak nungi osang tejangja meshitsü akok ta NBCC-isa metetdaksüogo.

Chief Minister Rio-i Prime Minister Narendra Modi aser Union Home Minister Amit Shah na den iba tebilemstsü lemsatapa Bill meyipa agiang ta rongshitsüla ta NBCC-isa ashi.

Mokokchung aser Jorhat district DC Level senden amen



Mangkolemba nung Mokokchung district aser Jorhat district Deputy Commissioner Level Coordination senden nung adenerkem külemi tangokba noksa ka angur.

Mokokchung, Chiteni/July 10 (TYO) : Tanü Mangkolemba nung Mokokchung district aser Jorhat district Deputy Commissioner Level Coordination senden ka menenogo aser iba senden nung tongtipang telemteba pezü agia liasü aser itemji yamai liasü.

Taoba mapang 2021 küm July 21 nü Chief Secretary Level Meeting nung mulungtepa lemtetba ama Ao Senden yimtsüng nung district anaprong nungi maparen balala talisa ki-ojen asüba maparen inyakbatem anenadoktsü aser tensa süngjema alitsü asoshi anatüsü inyaksüla ta

lemtet.

Mokokchung aser Jorhat Border Magistrates-i külemi anogo tenet (7) tsüngda nung Aokum yim lushi asadanga reprangtsü telemteba agi.

Tensa süngjema alitsü district administration anaprong tsüngda teti tongtepratepa alitsü aser talisa Border Magistrates aser police officers-tem teti dang osang agitepa alitsüla ta lemtet aser tatensa Nagaland nung tekülem agiba anogo Deobar dak alaka district ana tsüngda artsülen official border visits aser official maparen inyakba ajak nübur anatüsü metettsüsa sorkar

anaprongi mulungtepa tim tetuyuba nung inyaksüla ta lemtet.

Tanü iba sentong nung Mokokchung Deputy Commissioner Ajit Kumar ajanga tarur pela agizüka jembia sentong tenzük aser Mokokchung aser Jorhat SP anaprong ajanga tepela o jembia. Sentong nungsa Assam aser Nagaland Border Magistrate anaprongi shilem agia jembia aser Border Peace Coordination Committee (Assam-Nagaland) telok nungia shilem agia jembibaba den ADC Mangkolemba-i tepela o jembia sentong tembunga liasü.

DC Kohima-i FoodWiFi food delivery app sayatsü



Kohima, Chiteni/July 10 (TYO): Deputy Commissioner, Kohima, B. Henok Buchem, NCS-i Brehostibarnü Kohima nung pa indang office nung FoodWiFi food delivery app sayatsüogo, koba local businesses yaritsü aser Nagaland nung employment opportunities adokdaksütsü nükjidong nung state nung yangluba digital sapang ka sayaba alitsü.

DC Kohima-i iba sentong nung jembidang

entrepreneurship ya kanga tongtipang lir aser tanü sayaba app ya kanga nüngdaka aliba ka lir ta ashi.

Public sector nung maongka kanga ajema akumer, anungji lanurtemi entrepreneurship, innovation aser self-employment lenmang bushia inyaksüla, ta pai ayongzük.

Iba sentong nung FoodWiFi CEO Anato Sema-i iba sapang indang mangdang lemsatep aser Nagaland nung züngser aser mazüng aliba lanurtem

ajangzüksüsa sectors balala nung sen lenmang arutsü maongka agütsütsü nükjidong nung iba mera ya agia tenzük, ta ashi.

FoodWiFi nükjidong ya tangalen nungi arua state nung chiyongtsü bener arua agütsüba sapang tem lapoka aliba temelen agütsütsü asoshi lir, ta pai ashi.

Iba sapang yagi Nagaland indang rongsenketzüng tashi itshtitsü meranger, kechiaser business, employment aser revenue ajanga state telungzük nung alitsü aser kasa mapang local restaurants, vendors, delivery partners aser entrepreneurs tem yaritsü, ta ashi.

FoodWiFi yagi customers nem anisüngzük agütsüba kisüng masü saka rongsenketzüng tajangzük Nagaland telungzük nung alitsüsa sustainable local ecosystem yangerba nung yaritsü imlar, ta Sema-i ashi.

Mokokchung district kübok pension teyari balala agütsütsü

Dimapur, Chiteni/July 10 (TYO): District Welfare Officer, Mokokchung, I. Mangliyangba-i Hokulbarnü sangdong ka nung ashiba agi, State aser National Schemes kübok Old Age Pension, Widow Pension, Disability Pension agizükertem dangi 2025-2026 atema Direct Benefit Transfer

(DBT) ajanga item teyari magütsüi alir nem July 15, 2026 nü nungi tenzüka District Welfare Office, Mokokchung nung office mapang agütsütsü. Tsüngtong maruteter tem asoshi temelaba bener arur temi item teyari agir indang Life Certificate ya pei aliba arogo nung pastor nungi meshia

pension Payment Book den külemi bener arutsüla.

Sür aliba Beneficiaries atema temelaba agüja aliba nisungi Death Certificate den pension Payment Book aser Village/ Ward Council Chairman nungi Authorization Certificate bener arua pension teyari agizüksüla, ta ashi.

Item teyari ya Tsükong/Yimtsüng/Ward sasep yamai agütsütsü:

I. MOKOKCHUNG TOWN

- | | | |
|---|----|----------------|
| 1. Arkong, Aongza, Alongmen, Alempang, Artang Penli, Majakong, Mongsenbai, Kumlong, Lijabalijen | -- | 15th July 2026 |
| 2. Sangtemla, Salangtem, Sungkomen, Yimyu Marepkong, Kichutip, Dilong, Tongdentsuyong | -- | 16th July 2026 |

II. ONGPANGKONG

- | | | |
|--|----|----------------|
| 1. Ungma, Kupza, Settsu, Alichen Mokokchung Vill & Compound, Longmisa, Chuchuyimpang | -- | 17th July 2026 |
| 2. Longsa, Meilong, Moalenden, Chubayimkum Longkhum, Mangmetong, Satsu, Khensa, Mekuli | -- | 18th July 2026 |
| 3. Chungtia, Aliba, Kinunger, Sabangya, Longjongkong | -- | 20th July 2026 |

III. ASETKONG

- | | | |
|--|----|----------------|
| 1. Mopungchuket, Longpa, Chami, Kubolung, Khanimo Sungratsu, Yimchalu, Alongchen, Longjang | -- | 21st July 2026 |
|--|----|----------------|

IV. LANGPANGKONG

- | | | |
|---|----|----------------|
| 1. Yisemyong, Mongsenyimti Vill & Comp., Phangsang Longkong, Chakpa, Yaongyimti Old & New, Salulamang | -- | 22nd July 2026 |
| 2. Kangtsung, Wameken, Anaki Old, Anaki C, Anakiyimsen, Kangtsungyimsen, Aopenzu | -- | 23rd July 2026 |
| 3. Tuli, Luyong, Tzudikong Chubarongpang, Chuchuyimlang Vill. & Comp, Unger, Akhoya, Asangma | -- | 24th July 2026 |
| 4. Changtongya Vill. & Town, Changtongya Yimsen, Yaongyimsen, Nukshiyim, Liroyim, Merangkong Vill & Town, Kelingmen | -- | 27th July 2026 |

V. JANGPETKONG

- | | | |
|---|----|----------------|
| 1. Khar, Molungkimong, Yimjenkimong, Alongkima | -- | 28th July 2026 |
| 2. Changki, Nokon, Longnak, Merakiong, Molungyimsen | -- | 29th July 2026 |
| 3. Waromung, Chungliyimsen, Mongchen, Debuia | -- | 30th July 2026 |

VI. TSURANGKONG

- | | | |
|--|----|----------------|
| 1. Chungtiayimsen, Longphayimsen, Watiyim, Medemyim, Aokum, Aosenden | -- | 31st July 2026 |
| 2. Aosungkum, Satsuk, Shihaphumi, Akukaiga, Moayimti, Vikuto | -- | 1st Aug 2026 |

VII. JAPUKONG

- | | | |
|---|----|--------------|
| 1. Mangkolemba, Japu, Longjemdang, Alongtaki, Lakhuni | -- | 3rd Aug 2026 |
| 2. Changdang, Athuphumi, Nokpu, Aonokpu, Yajang A, B, C | -- | 4th Aug 2026 |
| 3. Lirmen, Akumen, Tsurmen, Saring, Longchem | -- | 5th Aug 2026 |

Ano Active Bank Account aliba beneficiaries nem Pension teyari pei indang Bank

Accounts nung tsünglanglen agüja aliba anogotem inoktsüogo :

- | | | |
|-------------------------------|---|-------------------------|
| 1. SBI | - | 16-06-2026 |
| 2. Bank of Baroda, Mokokchung | - | 17-06-2026 |
| 3. Bank of Baroda, Ungma | - | 23-06-2026 |
| 4. IDBI | - | 23-06-2026 |
| 5. Indian Bank | - | 24-06-2026 & 25-06-2026 |
| 6. NStCB Ltd | - | 25-06-2026 |
| 7. CBI, Mokokchung | - | 02-07-2026 |
| 8. CBI, Kubolong | - | 02-07-2026 |

State Old Age Pension (SOAP) Pension benefit inoktsüba anogo:

- | | | |
|-------------------------------|---|------------|
| 1. SBI | - | 06-07-2026 |
| 2. Bank of Baroda, Mokokchung | - | 07-07-2026 |
| 3. IDBI | - | 08-07-2026 |
| 4. Bank of Baroda, Ungma | - | 09-07-2026 |
| 5. Indian Bank | - | 10-07-2026 |

Chümoukedima DPDB senden nung LADP proposals agizük

Dimapur, Chiteni/July 10 (TYO): Ita shia amenba District Planning & Development Board (DPDB), Chümoukedima senden July 10, 2026 nü Deputy Commissioner, Chümoukedima indang Conference Hall nung Advisor, Urban Development and Municipal Affairs & Chairman, DPDB Chümoukedima, Zhaleo Rio lenisüba kübok mena liasü. Iba senden nung Advisor, Industries and Commerce, Hekani Jakhalu aden.

Advisor Zhaleo Rio-i senden nung züngsemtem den jembidang, Chümoukedima district nung sorkar indang offices tali amenokyonga arur asünung ketdangsür temi pei mapa nung nendaka inyaksüla, ta ashi.

Pai ketdangsür ajunga dang tenüng agi masü saka nükjidong yur bendanga agütsür nübur tenzüksü ayongzüka liasü.

Advisor Hekani-i jembidang, DPDB senden amen shia "Team Chümoukedima" koba inyaker aser koba tashi tejakleni aor ta lepa reprangtsü maongka angur, ta ashi.

State nung senotsü peria maliba tebilemtsü liaka aser revenue generation nung tayongzükba balala liaka local economy tashi itshtitsü asoshi jangja-jangja inyaksü nüngdaker, ta lai ashi. Board-i society registration atema applications agüja aliba asadanga jembi aser Pro Village, Molvom Village aser Odia Samaj Nagaland, 4th Mile, Diphupar ya registration atema temaba ketdangsür dangi yoktsü lemtet.

Board-i 2026-2027 atema Local Area Development Programme (LADP) proposals asadanga jembir agizüka liasü.

Chümoukedima nung District Industries Centre (DIC) amenoktsü onük süoka jembi aser iba maparen Sorkar sasep nung asadangba mapang lir ta metetdaksü. Parnoki lemteter senden tembang.

sorkar inyakyim shidak inyaka iba centre amenoktsü ta jembia liasü.

Senden nung Chümoukedima Saturday Bazaar nung suspension bridge yanglushitsü aser kasa tesem nung foot overbridge yanglutsü atema Chakhroma Public Organisation (CPO) ajanga tezüluba nung agüja aliba jembia liasü.

Parnoki iba onük ya State PWD dangi abentsü lemtet aser kasa teyanglushiba mapa atema District Disaster Management Authority (DDMA) ajanga se 4 lakh agüja lir ta metetdaksü.

Additional Deputy Commissioner T. Lemlila Sangtam, NCS ajanga tang teinyakdak Census exercise indang osang tongmelang agi lemsatepdang, tang tashinung shilem 25 shi ayimjemogo ta metetdaksü.

Iba exercise ketdangsütsü atema district nung Charge Officers pongu lir aser district nung iba exercise mapang shidak nung tembangtsü imlar, ta lai ashi.

Iba senden nung Yanathung Kithan, Scientist 'B', Nagaland Pollution Control Board (NPCB) ajanga Solid Waste Management indang PowerPoint presentation ka agütsüdang, scientific yimya amshia jana bensatsü, bendentsü aser indoktsü nüngdakba indang lemsatapa liasü.

Solid waste management dak sendakba nung Advisor Rio-i nübur ajungai Solid Waste Management Rules sülen anidaka temelenshi arudaksür akumtsüla, ta ashi.

Pai district administration, Chümoukedima Town Council aser nüburtem teka amteper inyaksü ayongzüka liasü.

Maneni taruba DPDB senden nung Urban Development Department ajanga PowerPoint presentation agütsütsü lemteter senden tembang.

H&FW Department-i sponsored candidate atema application meshir

Dimapur, Chiteni/July 10 (TYO): Sorkari melaba ama Department of Health & Family Welfare ajanga

Nagaland nungi (in-service doctors tem nem mezüng maongka agütsütsü) Regional Dental College, Guwahati nung academic session 2026-27 asoshi MDS "Orthodontics &Dentofacial Orthopaedics" nung post-graduate course küm asem sponsored candidate atema application meshir.

Candidate ya Nagaland

state nung alir asütsüla aser NEET-MDS-2026 qualified asütsüla.

Mezüng candidate-i kuli kar ajanga course agitsü memulungra, pa/la ajanga tezüluba nung menden ya meyipa agütsütsüla. Yamaji süra, iba mendenji waiting list candidate nem agütsütsü.

Menden ka dang lir, anungji jangra aliba candidates temi DHFW-5 (Training Section) nem July 16, 2026 tashinung application agütsütsüla, ta sangdong ajanga ashi.

National Conference-i Jantar Mantar nung longkak aittsü: Omar Abdullah

Srinagar, July 10 (Agencies): Hokolbarnü Jammu & Kashmir Chief Minister, Omar Abdullah-i, National Conference (NC) party-i Jantar Mantar, Delhi nung longkak aittsü atema temelaba meshir, ajisüaka nisung kari iba sentong nokdangtsü meranger, ta ashi.

NC-i July 20 nü tzüngluruwa mongpu Parliament senden tetenzük anogo nung Jantar Mantar nung mener longkak aita Jammu & Kashmir nem tanaben state jenjang agüjang, ta Centre sorkar nem takhangba agütsütsü, ta metetdaktüsügo.

NC-isa yimtenren party balala aser linük tesem balala nung yimsü lenirtem 52 dang longkak aibtaji pusemtsü mepishiogo.

Srinagar nung osangbenertem den jembidang Chief Minister Omar Abdullah-i, Jantar Mantar nung longkak aittsü atema tang tashi nungbo temelaba

mangu, ta ashi. "July 20 nü sentong ka agitsü. Onoki temelaba ngura sentong ka agitsü," ta pai ashi.

Jantar Mantar nung longkak aittsü atema Cockroach Janta Party (CJP) nem temelaba agütsüba dak sendakba nung chief minister-i, Jantar Mantar nung longkak aittsü atema CJP nembo ghonda 24 tsüngda temelaba agüja liasü, ajisüaka temelaba angutsü atema National Conference-ibo tesüiba anogo 4-5 atar, ta ashi.

Abdullah-isa, "Nisung kari NC sentong nokdangtsü meranger. Onoki anogo 4-5 meranga arudar, ajisüaka kari onok sentong nokdangtsü meranger. Parnoki parnok anogo melenshia onoki shimba anogo ang shimogo," ta ashi.

National Conference-i jaokba lenir 52 rongnung Congress lenirtem- Sonia Gandhi, Mallikarjun Kharge aser Rahul Gandhi nunger, DMK tongti M K Stalin, TMC

tongti Mamata Banerjee, Samajwadi Party tongti Akhilesh Yadav, BSP tongti Mayawati, RJD tongti Lalu Prasad Yadav, NCP tongti Sharad Pawar, UBT tongti Uddhav Thackeray, AAP tongti Arvind Kejriwal, YSR Congress tongti Y S Jagan Mohan Reddy, BRS tongti K Chandrashekar Rao, AIMIM tongti Asaduddin Owaisi aser SAD tongti Sukhbir Singh Badal nunger densema lir.

NC-isa Tamil Nadu chief minister aser Tamilaga Vettri Kazhagam tongti, C Joseph Vijay, CPI tongti D Raja, Rajya Sabha MP Kapil Sibal, taoba mapang J&K chief minister Ghulam Nabi Azad, PDP tongti, Mehbooba Mufti, BJP J-K Tir Sat Paul Sharma, Apni Party tongti Altaf Bukhari, Peoples Conference tongti Sajjad Lone, JKPCC tongti Tariq Hameed Karra, CPI(M) lenir M Y Tarigami aser MP Engineer Rashid nungera jaokogo.



July 10, 2026 nü Haridwar district nung SDRF sepaitemi lanur ka tasümang ayong nungi agitetdang tangokba noksa nung angur. Brihostibar nikongdang lanur ishika ayong nung tzü chigoba mapang nung pa tzü agi ponger aoba sülen anogo ka lir ang tasümangji angu.

**AXIS BANK**

Axis Bank Limited
AC Market Building , 4th Floor , 1, Shakespeare Sarani ,
Kolkata – 700 071 ;

HON OSETTEM AUCTION ASÜTSÜ ATEMA SANGDONGER

Talisa sen apurtem aser public dang ya sangdonger, tsünglanglen shia aliba Branch nung Axis Bank-i tsünglanglen aliba accounts nung gold ornaments pledge süa aliba ya public auction asütsü.
Tsünglanglen shia aliba sen apurtemi Bank nem security atema hon agi yangluba osetem agüja ("Gold Loan Facility") Axis Bank Limited dang nungi credit facility agia liasü. Sen apurtem/Guarantors nem Demand Notice agüja sen apurtem/Guarantors dang Gold loan facility agiba atema sentsüh agüjang ta metetdakja liasü. Ajisüaka sen apurtem/Guarantors-i loan agiba sentsüji magizüset nung bank-i hon osettem, talisa tsünglanglen schedule of property nung shia alibaji **11-08-2026 anogo nung anügdang 11:00 ako** nung "Kong aliar yamaji", "Kechi lidir yamaji", "Koma lidir yamaji" aser "No Recourse Basis" nung auction asütsüsa akümer. Auction ji yangi agitsü
Sen apurtem aser sentsüh osang tejangja

Customer Name	Loan A/c No.	Amount Outstanding	Date of Demand Notice	Gross weight grams.	Net weight grams.
BRANCH_RAC_NAME DIMAPUR [NL]					
ANITA ROYMS.	XXXXXXXXXX7163	136397.00	9/Mar/26	26.200	21.900
YATETENLAAO	XXXXXXXXXX5129	150167.00	15/Jun/26	15.100	14.800
BRANCH_RAC_NAME- LHOMITHI BAZAR NL					
VISHELI ACHUMI	XXXXXXXXXX5371	109968.08	4/Jun/26	10.800	10.600

TENDER ATEMA TELATETBATEM
Base/Reserve price ji tender asürtem nem auction anogo nung agütsütsü. Bid asütsü atema bank-i agütsüba prescribed tender form nung agütsüba bid/offers dang agizüksü. Bid form/tender nung mabensaba kar danga lira ibaji tamagitsü ta azüngshitsü aser magizüksüa akok.
Tender documents den telatetbatemji tekalen shia aliba branch nungi agizüksü. Tender document ji ajak renemba sülen 11-08-2026 anogo nung tim branch official nem office mapang nung agütsütsü. Anogo süiadokba sülen agütsüba tenders magizüksü. Shia aliba osettemji "Kong aliar yamaji", "Kechi lidir yamaji", "Koma lidir yamaji" aser "No Recourse Basis" nung auction asütsü. Shia aliba oset indang standard, purity mesüra sentsüh aser tax tagütsütsü lira iba atemaji Bank-i kuli magitsü. Tekalen shia aliba auction anogo aser mapang nung offers dak sendakba raising/revising asütsü atema tender asürtem lia Bank-i tender lapoktsütsü.
Branch Tenüngtem Tekalen Shia Lir. Auction Anogo: 11-08-2026.
Offer/tender khi agütsübaji tanaben agentsü makok aser bid asütsüpurtemi temeja article/asset/ornament atema single bid/offer süra bid amount deposit asütsü.
Temeja article/asset/ornament kar atema bid ka dang teimba süra bid asütsüpurtem tsüngda inter-se bidding alitsü aser teimba bid asüsangji takok angur bidder ta sangdongtsü.
Bid asütsüpurtemi KYC documents ajak agütsütsüla i.e. PAN Number, PAN Card, Adhar Card & Address proof etc. Bid asütsüpurtemi E-mail ID aser Contact Number agütsütsüla
Offer agizüksü mesüra magizüksü atema Bank dak temeden lir.
Ayoktsü atema shia aliba property dak sendakba nung mangatettep kar danga adokra ibaji Mumbai nung aliba jurisdiction of Courts/ Tribunals nung dang bentettsü.

Anogo: 11.07.2026
Tesem: Kolkata

Authorized Officer,
Axis Bank LTD

2029 küm nungbo 'One Nation, One Election' renema alitsüa akok

New Delhi, July 10 (Agencies): 2029 küm Lok Sabha elections nungbo 'One Nation, One Election' mapa küma benoktsü atema Joint Committee of Parliament-i inyakdar, aser 2029 küm tashi nungbo iba ya renema alitsüa akok, ta Hokolbarnü Committee nung mendenbuba, PP Chaudhary-i metetdaksü.

Goa nung anogo ananü committee senden amenba sülen osangbenertem den jembidang Chaudhary-i, 'One Nation, One Election' atema linük tesem ajaklen lokti tentet balala nung lenirtem den jembishinüdar, aser tang tashi nung aikati iba ya pusemdar, ta ashi.

Paisa, mapang balala nung election aiben agiba ajanga India nunger senpong nungi sen 7 lakh crore shi takoksa angur, ta metetdaksü.

Committee-i Goa nung ayongzükba senden tenzüka Constitution (129th Amendment) Bill, 2024 atema jembi aser Goa chief minister Pramod Sawant aser state cabinet züngsemtem den-a shisa lemsatepogo.

Chaudhary-i, "Onoki Goa nunger ajak tenüng nung chief minister aser cabinet minister tem den shisa lemsatepogo. Onoki 'One Nation, One

Election' atema jembiba den külemi iba dak sendakba tayongzükba balala atema jembi," ta metetdaksü.

Paisa, committee-i Gujarat, Karnataka, Maharashtra, Himachal Pradesh, Uttarakhand, Punjab, Haryana aser Delhi densema state aika semdanga linük temzüng tsütsü mongintem, shisashirtem, lokti tentet balala nungi lenirtem aser stakeholders ajurua jembioigo, ta ashi.

"Lokti tentet balala aser organisations shilem 99-i election khenyongi dang agitsü pusemba lemsatepogo. Onoki maneni yimtenren party ajaki agizüktettsüsa inyakyim benoktsü atema inyaktsü,' ta paisa metetdaksü.

Taoba mapang linük Tir Ram Nath Kovind nem agütsüba report ajanga ashiba agi, linük tesem balala nung election mapang balala nung agiba ajanga sen 7 lakh crore shi takoksa anguba bushitetogo, anungji khi nungi dang election agiba ajanga rongsenkettzüng tsütsü senotsü aika kümzüktsü, ta pai ashi.

Chaudhary-i, One Nation, One Election ajanga 2047 küm tashi nungbo 'Terenlok India' alizüng tongtetba nung shilem tulu agitsü, ta ashi.

Küm 40 tsüngda tang mezüng India PM kati New Zealand semdanger



Melbourne, July 10, 2026: Ato kilonser, Narendra Modi-i Australia semdangba sülen Auckland, New Zealand-i apusoa aotsü lia Melbourne Airport nung tangokba noksa nung angur.

New Delhi, Chiteni/July 10 (Agencies): Hokolbarnü Ato kilonser Narendra Modi New Zealand tonga ogo; tesüiba küm 40 tsüngda tang mezüng India nunger Ato kilonser kati iba linük semdanger, ta ketdangsertemi metetdaksü.

Modi Auckland nung aliba airport tonga aoba mapang nung New Zealand Ato kilonser, Christopher Luxon den ketdangsertemi pa agizük. Modi tayimtsü nungi ayazüka aluba sülen Luxon den salem aser azütep.

Ato kilonser Luxon-i jaokba nung ajemdaker Modi-i anogo ananü iba linük semdanger. Iba mapang nung tenati linük ana tesendaktep tajungba akümstü atema jembitsü.

Yaküm March ita nung Luxon-ia India semdanga liasü. Linük ana tsüngda India-New Zealand Free Trade

Agreement agiba sülen mapang tatsüka tsüngda pai India semdang.

Modi aser Luxon nati lenla aika nung tesendaktep tajungba akümstü atema jembitsü; talisa r o n g s e n k e t t s ü n g , shishilembaba aser commercial sectors nung taliba amalitepa inyaktsü atema jembitsü, ta ketdangsertemi metetdaksü.

Modi-isa New Zealand nung business lenirtem aser saisapongertema ajurutsü aser India nungertema ajurua jembitsü.

Ministry of External Affairs (MEA)-i, lenir anati tesüiba küm ana tsüngda linük ana tsüngda tesendaktep reprangshitsü, ta metetdaksü.

Modi-i Indonesia aser Australia na semdangba sülen tang New Zealand semdanger. Iba ya India nunger Act East Policy den sendaktepa lir.



TIR YIMYIM YIMOBILEM (EDITORIAL)

DIMAPUR

KÜPTOKNÜ

CHITENI 11, 2026

Kodaser Govt. school ajungtsü ?

Taküm 2026 küm Nagaland Board of School Education ajanga agiba class ter tatidang nung tematiba takok angur parnok 56 nem tenüngsang senpet agütsüba sentong nung School Education department nung Advisor-bai parnok 56 rongnung Govt. High School nungi takok angurbo ka danga malia ta temulung machi o ka shisembaji ajak atema tebilemdangtsü aser temerangdangtsü tayongzükba o ka lir. Atangji, Nagaland nung government school junga anepalu mesütetba osangji tanü tasen masü saka temulung masüba o jembi shiaji temulung tagütsüba agüja inyaksü asoshi tajungshi aser tayongzükba o ka ama ajaki agizüktsüla. Aji oda, government school-tem nung azüngertemi class 10 nung tangar private school-tem nung azünger menepa takok mengutetba asoshi saseta jembiba mapang ya asenok asoshi tamakok anguba kuli bushitsü mapang tajung lir. Atangji, government school nung azüngertemi tematiba takok jenjang mengutetbaji tesayurtem kija dang atongtsülabo masütsü akok, mesüra tanurtem kija aitsütsüabajia tim masütsü. Ajisüaka, government school majungba taiji lemzüktsüdi süra government nem lemzüktsütsüla, kechiyong aji government school lir. Government-ji government school-tem madak kibur lir aser kibur pei school mangu aser mereprangdang nung kodaser ajungtsü ? Aji oda, school majung dang government nung chief minister-i mesüra Advisor-bai mesüra Commissioner, Secretary aser Director-i government school majungbaji parnok masü saka tesayur aser tanurtem majungba agi majunger amai bilemra government school-tem shirangba tashidak tai puteter asütsü. Atangji, government school-tem nung sayur tesayurtem ajak junga azüngba tashitemeteterem lir saka ashiko, parnok aikati temulung agüja mesayur asütsüa akok. Kasaji, government school nung azünger tanurtemjia tangar tanurtem dang nungi mechiraba aser majungbabo masü saka lesson nung temulung magütsür asütsü. Item tashimaittemji tashi itshidaktsütsü asoshi government nung nisunga lir aser senotsüa lemzüktsür. Ajisüaka, tanü government school-tem majungbaji tesayur aser tanurtem majungba kisünga agia masü saka parnoki school kibur memetet aser kiburia parnok memetet, anungji kibur maliba school ka kodaser ajungtsü ? Nagaland nung private school ajungbaji tanurtem dang nungi fee aika agia sayuba agi masü mesüra tesayurtem nem government school tesayurtem dang nungi teimba ita sen agütsüba agia masü, saka school kibur tesayur aser tanurtem meteta anepalur aser tesayur aser tanurtemia school kibur meteta pei mapa nung temulung agüja inyaker ta asüba agi takok angur. Ibaji külemi inyakba takok lir. Atangji, tanü government school inyakyim nung Government school shia nung telidak purtem rongnungi yimten aser lokti lenirtem dena Education Committee tenteta aliba angashir, ajisüaka tesem aika nung iba Committee jagi kibur küma khuret abener masü saka school nung tenyatenponger ka ama dang inyakba angur. Ibayongji, government school ki aser temeket koma lir ? Tesayurtem timtem aser nüngdak lir mali ? Tanurtem amenba takdang aser menden koma ? Tesayurtemi tanurtemi angatetsüsa lesson sayur asü mesayur ? Government nungi school atema nüngdak shitak yoker asü meyoker (?) ta asüba nüngdaktemji tebushir-a mali aser tagütsür-a mali ta government school-tem aika takoksa ngudagi. Aji oda, School Education department nung minister, advisor-i anir Commisisoner Secretary aser Director-i tonga-tonga oa peisasa pei khuret meteta inyakra, government school-tem ya manger sangwa nung langka ain agi inyaker ama junger alitsü. Joko, tulurtemi anir asenok kibong aser taküm ya government school-tem nem memesüdaktsütsüla saka asenokiang government school mesütsüla, Iba tangatetba nung kodang asenoki asenok meyong government school-tem anepalu tenzükdir, asenok dang nungibo government school nung azünger soru aser jenjang tajungba kümadoksü. Idangjibo, ano kodaser Nagaland nungbo government school-tem tajungba ta tangari metetnüa asüngdangtsü. Iba ama anogo ka asoshi asenoki khen bendanga agüja inyakdi.

OLEMSABANG

Arogo dang Mungdang tuluba masü

S. T. Yapang Lkr, Kohima.
9612800973/9856714829

Khrista dak amangba lokti aika liaka asen Nagalima nungbo Catholic, Pentecost, Revival aser Baptist ya asenoki jangja meteta alibatem asütsü, koba teloka süang Arogo ya Laishibai melaba tentet ka, saka Baptist purtem asoshibo item arogotem telungjem ka tenteta iba telokji arogo dang tuluba kümer tashi amshitsüji Laishiba tesayuba nung mangur, Arogo kaji Mungdang ka kübok kechisüdir süaka adentsüla (affiliated asütsüla) ta bilemra itemji Khrista dak amangba nungi talangka pilaba tamaitüsü aji asütsü, arogoji Khrista dak ang sentaka lungjema alitsüla. Mungdang ka tenzüka yangji lungjema aliyonga tajungba dang, saka aji Arogo madak tashi amshitsüba masü, ajimesüra iba Mungdangji toktsü tajungba asütsü. Ano Mungdang nung tenzükerji Arogo nung tenzüker den kasa masü, pa/laji mulungtet telok NGO ka nung tenzüker dang ashi aji Arogo madak kibur masü. Ajisüaka yamala NGO nung inyakeritemji joko inyakeri dena aibelen bilemba aser netsüng nüburtemi dena NGO ka nung inyaker sürnung Arogo madak tuluba oda Sannüker dang tuluba ama tanela jenjang nung bilemba ajurudangogo, ano pei sasa peiji temeshitiba taküm aser Tsüngrem melena inyaker ama bilemba ajurudangogo. Shidi sürbo yim tilatiba Arogo ka nung sannükerji Mungdang nung ES/GS dang nungi tuluba. Kari Mungdang nung inyakerji Arogo tilaka nung Sannüker dang tuluba ama bilemra pa/laji joko Laishiba tesayuba nungi pilaba tamaitüsü aji asütsü.

Iba amala inyakyim aika ajangshia arudaki, asenoki metettsü asoshi ni aika ajangshiogo item rongnungi tila ka shinür, 2023 küm ni asen Nagalima Baptist Mungdang ka nung General Secretary ajurutsü asoshi office jaki ao, aiben odangaka majurutet, oda MLA Minister ka den ajurutsüba ang temelaba. Aiben odanger kenüji GS office anasa Office Assistant mena liasü, anungji ni pa dang "GS ajurunüa aru" ta ashi, pai "Na kechi nüngdak atema?" ta asüngdang nung, "Pai kaket nung tai kuli zülua lir, aji melenshiang ajimesüra okadaki anir aotsü ta ashitsü atema ni aru" ta ni ashi, pai ni khenpika bangka repranger "Mungdang ka nung GS kati zülubaji joko aji Yisu melen, aji tatem" ta ashi, anungji ni "ibaji Laishiba koba tapu nung yamaji asütsüsa shia lir? Nüngdak süra GS-ji office nungia atsüzüka yutsütsü" ta ni ashi, pa niji kanga süngmanga repranger "Tanübo meeting lir anungji asüng call südang arung" ta pa opung züngya agütsü, tananü ni call südanga jembir 12 shi nung arung ta ashi, jembiba ama 12 shi nung office atong, saka Office Assistant jaki "11 nung arung ta ashi nung nai menur aru anungji majurutettsü" ta ashi, ni küna jembiba mangaoka (record) yua aliba angadaktsü, paji tera nema medangteti GS denji ajurutsü mela, ni GS office telungi ai nung paibo kanga pela jembi. Yamaji Tsüngrem tenzükerji Kotak nung tua mena ali ama tamanger aikadi bilemdar, aji temenen tanülai apurtem.

Ibanü GS denji jembiyonga or pai ashi "Ni iba kin Mungdang dangi shiti ka jangjanüa yok nung ajia melangzüteteter, iba amala Mungdang nung ketdangpur jaki kin ka koda tanela nung tejakleni anitsü?" ta jashiseta shia liasü, ni pa dang "Parnok temenen tanülai puogo, saka na ne menen nungi pungteta tuguang, kecha telok, kecha kin mesüra koyimbaia na mekümzüktettsü, anungji na ne sasa ne aibelen metongshiang" ta dang shir yutsü, pai tashi anga melenshi nungji ajak asoshi tajung aser asen Tsüngrem tenüng asanger.

Tekalen shia aliba ama Mungdang ya Arogo masü, aser Arogo ya dang Laishibai melaba tanelar ketdangsür telokji lir, telungjem telok kwi tenzüknür tenzükan aji tajungba dang, saka ajibo Mulungtet telok ka dang, oda aseni ashitsü agi NGO ka dang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

West Bengal nung Khristantemi July 14 nü longkak aittsü



July 08, 2026 nü Kolkata nung Khristan lenirtem senden ka amenba sülen tangokba noksa nung angur.

July 10, 2026: July 08, 2026 nü West Bengal yimtiba, Kolkata nung Khristan lenirtem senden ka mena state tesem balala nung Khristantem aser Arogo kiojen amakba tatalokbatem atema tebilemtsü akaba lemsatepogo.

July 09, 2026 nü osangbener den jembidang Bangiya Christiya Pariseba (Bengal Christian Council) tentetsang, Herod Mullick-i, "Iba ya asalentong yanglur Tenla kitem, Arogo rejutem aser Khristantem amakba südi ta onoki tebilemtsü kanga akar," ta ashi.

Herod Mullick-isa, "Khristantem amakba sülen Khristantem nem tai tonglokja 'Khristantemi kangshia tangartem Khristan yimsü dangi meyipdaksür', ta aitsür," ta ashi.

Paisa, mangatettep adokdaksütsü aser Khristantem anema inyakdaksütsü atema social media nung osang balala prokshir, ta ashi.

Arogo nung lenir kati, "Tang state nung Khristantem anema inyakba tatalokbatem ya taoksatsüka lir. Akhidang nungi West Bengal nung yimsü balala amangertem akhümtsübutepa tesünep nung dang lia aru. Yimtenren nung tangatetba balala liaka tesüiba mapangtem nungbo yimsü nung ajemdaker item ama tatalokba ya malisü," ta ashi.

July 4 nü Paschim Medinipur district nung Khristan kiyimba sentong ka nung Hindu nationalist telok kati timtem agüja liasü, aser Arogo nung pastor Anup Ghosh pua tiyazü nung tai tongloktsü, ta BCP-i metetdaksü.

Anogo ka lir July 5 nü Purba Bardhaman district kübok Faridpur kiyong nung Grace Church nung tekülem sentong tagidak mapang nung Hindu nungertemi amak. Parnoki Tenla ki raksatsü, sen, mobile phones aser tongtibang documents aika auya.

Anogo ka tejaklen ang

Arogo dang sen lakh 2 agüjang ta takhangba agütsür liasü. Arogoi police nem iba osangji metetdaksü saka police-i kecha meinyak.

Kasa anogo nungjisa South 24 Parganas district nung mejangjaba nisungtemi Tenla ki tesüdak ka raksatsü aser kilem kolak nung Kangki raksatsü, ta BCP-i metetdaksü.

West Bengal nung Khristantem amakba anema BCP-i July 14 nü Kolkata nung longkak aitba sentong ka agitsü tebilemba lir.

BCP-i Arogo nung lenirtem, lokti tentet balala aser sensotem dang yimsü balala amangertem tesünep nung alitsü aser linük temzüng kübok temeden balala atema takhangba agüja iba sentong nung dendaktsüner, ta metetdaksüogo.

Nütsüng million 90 aliba West Bengal state nung Khristan nütsüngbo shilem kata majung; Hindu nütsüng shilem 70 aser Muslim nütsüng shilem 27 lir.

Maharashtra nung Arogo aser rejutem kiojen 'audit' agitsü

July 10, 2026: Maharashtra state sorkari shilem lemsar state tesem ajaklen Arogotem, Khristan missionary organisations aser Khristan rejutem meyong kimong aser kiojen ajak audit agitsü atema tetuyuba agütsüogo.

July 8, 2026 nü state Legislative Assembly senden nung Revenue Minister, Chandrashekhar Bawankule-i iba osangji metetdakja liasü.

Minister-i, Arogotem aser Khristan rejutem meyong kiojen audit agiba maparenji ita 3 tsüngda tembangtsü aser ozüng alema inyaka lira ibaji anema inyaksü, ta metetdaksü.

Bawankule-i, "Iba ya ozüng alema ali atsünga agiba, mangatettep li agiba aser ozüng alema inyakbatem jangjatsü atema lir. Iba mapatong ya sorkari state tesem ajaklen ali dak sendakba records tejangja ayutsü atema lir," ta metetdaksü.

Minister-i, "Documents

shidak alirtem atemabo shisabulutsü kecha mali. Ajisüaka inyakyim mesüra ozüng alema inyakbatem lira sorkari item ken o asadangtsü aser tim teinyaktsü inyaksü," ta metetdaksü.

Bawankule-i, iba mapatong kübok British nunger yimsüsüba mapang nung missionary organisations-i agiba kiojentem aser linük nüchiso anguba sülen agiba kiojentem reprangshitsü aser ozüng alema inyaka lir asü maliar kuli bushitsü, ta ashi.

Iba maparen ya divisional commissioners kübok committee kati inyaksü aser iba committee nungji Settlement Commissioners, police aser Inspector General of Registration-a alitsü, ta paisa metetdaksü.

Ano residential colonies atema agiba ali mesüra public infrastructure atema amshiba ali-a reprangshitsü, iba sülen sorkari legal tsütsü mongintem

den jembiteper telemtetba agia inyaksangshitsü.

Assembly nung BJP MLA, Devayani Pharande-i, mapang talangka mebenteti aruba Nashik Diocesan Trust Association Limited (NDTA) dak sendakba ken o benoka liasü.

Pharande-i, British nunger yimsüsüba mapang nung amshiba li nung tangbo Khristan schools, colleges aser hospitals lir, trustees süadokba sülen ali records raksatsü aser tangbo nija ket nung lir, ta ashi.

Tawa ang Khristan telok kati Mumbai Police Commissioner ajurua right-wing teloktemi Khristantem tekülem sentong agiba mapang nung timtem agütsüba metetdakja liasü.

Organisation 25-i akümba telok 'Mumbai for Peace'-i, Khristantem tekülem sentong tagidak mapang nung timtem agütsür aser Khristantem anema osang tai proker, ta metetdakja liasü.

ANOGO ABEN TSÜNGREM DEN

Taochi agi sünga aliba Tsüngrem

Aser shirnok teti tatem maka taküm asoshi Pa dak amangtsü, parnok dang tatishitsü asoshi, Yisu Khrista Pei talangka aremzükbaba ajak kü dak, tongtiba ama, jungkai adokba sayutsü aji asoshi ni yimlibilem angu". 1 Tim. 1: 16.

Tsüngrem taochi agizüker rongnung Paul-a liasü. Damaska lenmang nung Tsüngremi tesüngmangtsü inyakyim sayu. Kari ashir, Pauli temenen ulura mena nung iba anogo nung, "Tsüngrem, temenenba dang aochiang!" ta Pauli ayimten. Saka iba anogo nung tayimtenba mali asü, kechiaser kodang Khrista kangki nung asü Tsüngremi taochi talubosa sayuadok. Khrista ajanga Pa dangi arur ajak dang Pai talubosa taochi agütsür.

Taochi dak alaka Pa tanga ka asütsü makok, kechiaser ibaji Pa jakla lir. Asenok ama Paul Tsüngrem taochi tzülok nung noktak aser iba tzüsem nung chigua meshitet. Temenenpur kati Tsüngrem dangi arua Pa taochi agujang ta mepishitsü kecha tarendaktsü mali. Pa taochi ayimba tetandang mali; kechaia noktangtsü makok ayimer!

Nisungi iba ayong jagi arutsüla, kechiaser yangji meshitoktettsüsa kecha temenen mali, memerüktettsüsa ar kecha mali, tamakok kecha teti asoshi mali, aser Tsüngrem taochi metongtettsüsa aibelen kecha mali ta angatettsüla. Tsüngrem taochi-i ajak meshitettsür. Tayindangba sü shidangogo. Kümtetdakba taochi menden nung mena lir, koba nungi ayong ayimer; shirnoki tamang agi pungok ajak shidoktsür.

ICC-i 2026 Global Persecution Index saya

July 10, 2026: International Christian Concern (ICC)-i metetdaksür. Osang ajak 2026 Global Persecution Index (GPI) sayaogo; 'Faces of the Persecuted' ta ajaba report nungji linük 20 dak tali nung Khristantem reshikangshiba osang tejangja aser tamangertem kuli densema lir.

Kasa report nungji ICC-i linük balala nung reshikangshi ajangshiba Khristantem yariba osang metetdakja lir.

Global Persecution Index (GPI) ya US nung Khristantem atema ketangsertem, osangbenertem aser stakeholders nem reshikangshi ajangshiba Khristantem tia metetdaksütsü atema lir, iba denji külemi ICC nungita yarirtem atema lir.

GPI report azüngertemi sarasademsüba, reshikangshi ajangshiba Khristantem tia sangdongba aser maparen balala ajanga reshikangshi ajangshiba Khristantem yaritsü akok.

ICC Tir, Shawn Wright-i, "Taküm Global Persecution Index ya ajanga Khrista nung asen aianu aser adianu million aika pei tamang atema timtem

ajangshiba nenshia nungji chichiba tajangshibatem lir, kari sadoksadoka alitsü aser kümzüka alitsü melen Yisu dang shimmer. Iba report ajanga yimsüsürtem aser stakeholders-i reshikangshi ajangshiba Khristantem tia rajemtsü imlar, iba denji külemi iba report azüngertemi rongdak süa temeim mapa inyaktsü onoki imlar," ta metetdaksü.

Taküm GPI report nungsa Khristantem atema reshikangshi tensa tamajungba akümba linüktem aser lenirtem tenüng sangdongogo, aser item lenirtem rongnung Nigeria Tir Bola Ahmed Tinubu, Nicaragua Tir Daniel Ortega, Syria Tir Ahmed al-Sharaa aser India Ato kilonser Narendra Modi nunger densema lir.

ICC-isa item linüktem nung yimsü temeden jenjang tajungba akümtsü aser reshikangshi ajangshiba Khristantem khu pungbadaktsütsü atema yimsüsürtem aser organizations balala den tebilemba onüktem lemsatep.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Yok

(v) odaktsü (sent)

* Tsüraburi par tanur tangaleni tazüangi yok.

Yokji

(n) Nüktang, ki tangitba süng (supporting posts)

* Ki akanga nokdaktetsü atema yokji enoka tangiter.

OLONG PAITEP # 7562

1	2					3			4	
						5				
6				7						
								8		
9		10				11				
				12						
13									14	15
	16								17	
18										
				19						

TIPIEN

1. Pongentsür dang ajaba - (7)
5. An-i akoba - (5)
6. Ta _ _ _ gka - (3)
9. Pei indang aküm - (3)
11. Tzü nung alir - (5)
12. Talangba aküm - (3)
13. Yangluzükli - (5)
14. Ozü ka - (3)
17. Songtem - (3)
18. Ken yimya - (5)
19. Kumtetdakba - (7)

LANGTSÜNGLEN

2. Teimla ayu - (5)
3. Ajir / Penzür - (9)
4. O jembiba yimya - (3)
7. Tali anguba - (9)
8. Lokti tentet - (4)
10. Itsük tzü - (4)
15. Apitet - (5)
16. Shishilembatsü atema amshiba - (3)

OLONG PAITEP # 7561 TELANGZÜBA

TIPIEN :

1. Semtu, 3. Lepko, 5. Bilem,
8. Ulu, 10. Tsünpang,
11. Tesangwa, 13. Aoksa,
15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER MA



Nüngtugu kentener Harry Styles-i July 3, 2026 nü Wembley Stadium nung shilem agiba ajanga putiotsü nung otsü tasen ka yangluogo. Harry-i Wembley Stadium nung pa indang Together, Together tour 12 buba show agia liasü aser "longest residency by a musician at Wembley Stadium (single run)" otsü tasen yanglu. Harry-i June 12, 2026 nü Wembley nung sentong agitsü tenzüka liasü aser iba ya pa indang kensep pezübuba "Kiss All The Time" atema agia liasü. Sentongtem nung nüngtugu country star Shania Twain-ia Harry den shilem agiogo.

Centre nungi teshimtet telok kati Arunachal tzümetsüng asadang



Dibrugarh, July 10, 2026

(Agencies): Centre nungi Joint Secretary (Home), Government of India lenisüba kübok teshimtet telok kati Arunachal Pradesh nung tzümetsüng agi kongshiba tesemtem semdangogo.

Centre nungi züngsem ti agi akümba teshimtet teloki tzümetsüng ajanga timtem bentsür aruba asoshi akokba tashi teyari agütsütsü

nangzük.

Lower Siang district nung osangbener den jembidang Tiwari-i tzümetsüng agi kanga mejungi kongshiogo aser tzümetsüng agi kongshia aliba district tem nungi detailed reports aser data bendendar ta ashi.

Nari-Koyu MLA Tojir Kadu, Pasighat West MLA Ninong Ering, aser East Siang o Lower Siang district tem nungi

ketdangsürtemi Centre nungi arurtem meina senzü.

Tsüingsang majungba ajanga aerial survey magitet aser iba jagi Lower Siang district nung tzümetsüng agi kongshia aliba tesemtem gari ajanga dang sema senzü ta Tiwari-isa ashi.

June 24, 2026 nü Keyi Panyor district nung tzümetsüng aser anentsüh lendong balala atalokdang nisung asem asü aser ana samar bushitepdar.

Meghalaya sorkari St. Xavier's University lapoktsü melar

Shillong, July 10, 2026

(Agencies): Meghalaya nung St. Xavier's University amenoktsü mulunga agizüker aser Mawkhanu nung jenjang dalang agi ali acre 50 agütsütsü Meghalaya Cabinet-i lemtetogo.

Iba lemtet ajanga sorkari state nung higher education akangshitsü tenangzükba aliba nenshir ta Chief Minister Conrad K. Sangma-i ashi.

Cabinet-i university

ketdangpurtem den jungjunga jembiba sülen land allotment mulunga agizükogo. Iba ali ya hectare ka nung Rs 1 lakh agi ajemer agütsütsü ta pai ashi.

St. Xavier's ya tongtipang reju ka lir aser parnok dak academic excellence senmang keta lir. Iba mapa ya asen lanur tarutsü atema rizüngba ka asütsü ta CM Conrad-i ashi.

"Meghalaya nung St. Xavier's University amenokba

ajanga higher & technical education akangshitsü aser kasa mapang state aser Northeast region nungi kaketshirtem asoshi maongka tasentem bentsür arutsü" ta paisa shisem.

Sorkari "world-class educational opportunities" bentsür arutsü mangdang lir aser Meghalaya nung education sector temaba jenjangi ajungkettsü ta CM Conrad-isa ashi.

Recovering Warriors-i tzümetsüng atema Rs 89,094 bendentet

Itanagar, July 10, 2026

(Agencies): Arunachal Pradesh kübok Keyi Panyor district nung tzümetsüng agi kongshia aliba kibongtem yaritsü atema Recovering Warriors-i Rs 89,094 bendentetogo.

Recovering Warriors ta asüba ya addiction survivors telok ka lir aser parnoki anogo asemnü tenla bendena liasü.

July 3 nungi July 5 relief campaign agidang parnoki Oyan Main Market, Ruksin Main Market aser Pasighat Main Market nung senzü aser idangji

shishilembartem, temeket nung alirtem aser senzusenbongertem tenla balala agütsü.

Pasighat Main Market nung parnoki Rs 38,471 bendentet, Oyan nung Rs 28,340 aser Ruksin nung Rs 22,283 bendenteta liasü ta Recovering Warriors-i metetdaksüogo.

Parnoki cash donations aser authorised digital payment platforms ajanga bendentetba senji Siang district kübok Ruksin nung Additional Deputy

Commissioner ket nung agütsüogo.

Iba sülen senji Keyi Panyor district nung Deputy Commissioner indang relief account-i yok. Iba ajanga tzümetsüng agi kongshia aliba kibongtem asoshi relief materials aser tanga essential assistance agütsütsü.

Recovering Warriors züngsem Mohan Tamut-i Oyan, Ruksin, Pasighat aser temeket alirtem dang parnok mulungsoa yariba atema pelaba metetdaksüogo.



Meghalaya kentener Kitkumar Nongsiej-i World Championships of Performing Arts (WCOPA) 2026 nung India tenüng nung shilem agitsü. Iba benjung ya Las Vegas, USA nung July 13 nungi 21 tashi amungtsü. Nongsiej apusoa maodang Don Bosco Youth Centre (DBYC), Laitumkhrach-i Don Bosco Media Network (DBMN) den külemi DBMN TV studio nung prayer service & send-off ceremony ka ayonga agia liasü.

Spain morok-mi lendong nung nisung 11 asü, 19 samar bushir



Madrid, Chiteni/July 10 (Agencies): Spain south tsütsü Almeria nung morok-mi adokba lendong nung nisung 11 asü aser 19 samar bushir, kong Hokulbarnü firefighter temi linük puti otsü nung tesashitiba mi remseptsü meranger.

Ketdangsür temi ashiba agi, asürtem ya timba bendanger amai lir, shirnoki tesem balala nung jenoka alitsü totuyuba agütsüba senzuka yutsü.

Mi ya Almeria province kübok Los Gallardos jila temeket nung aliba süngnü nung kanga kera jangroyonga ao aser anasa Bedar hamlet nung tali kongshi, ta Andalusia region nung head of emergencies Antonio Sanz-i ashi.

Ketdangsür temi nüburtem dang pei ki telung nung alitsü ashi aser asürtem ya pei gari nung ajentsü merangba mapang asüba amai ajiteter, ta pai ashi.

Nisung pezü gari ka nung sür liasü aser parnok ya British nunger mesük, kechiaser parnok indang steering wheel ya

achichilen lir, ta pai ashi. Nisung tenet parnok indang gari tem yutsür tetsüng agi lenmang ka nung ajentsü merangbang asüba amai ngutet, koba evacuation plan nung meliasü.

"Timtem ya tulu liasü. Yimya ajak agi asürtem ya timba mesüra ajak amai bendanger ama sayur," ta Sanz-i ashi.

Iba tatalokba tensa ya kidanger Portugal linük nung June 2017 nung atalokba den mesükteper, kong heatwave mapang morok-mi tuluka adoka nisung 60 dak tema asü aser timba yiru, aser asürtem ya tesadang ka pei gari nung mener ajentsü merangba mapang rongsetba liasü.

Sanz-i nüburtem dang ketdangsür temi totuyuba agütsüba sülen anidaktsü ayongzük aser ketdangsür temi takum kumzükba nung rangloker asünung iba ama lendong aketba mera magitsü ashi. Ano nisung pezü kanga sashia ronger mozüki nung anepaluba mapang lir.

Andalusia indang regional sorkar tekolakba Juan Manuel Moreno-i ano nisung 19 samar bushiba mapang lir ta Cadena Ser radio dang ashi.

Power cable ka süngolio takong nung tsüka mi ya tenzük südi ta bilemer, ta anasa aliba Antas jila indang mayor Pedro Ridao-i ashi.

"Nikongdang mopung ona liasü, aser ibaji ajanga mi ya jangroyonga ao. Ammang arudang onoki mi jangrua farmhouses, holiday homes aser gari tem arong, anungji onoki remseptsü tenzük," ta Ridao-i ashi.

Iba tesem nungya longren aika lir, anungji emergency services agütsütsü asaker, ta pai ashi.

Spain Ato Kilonser Pedro Sanchez-i X post ka nung, iba morok-mi ajanga takoksa agütsüba asoshi kanga jashir aser aoksar ta ashi aser asür kinungertem den asükhu lemsatepa liasü.

May aser June ita Europe anüolen heatwaves ajanga tesem aika nung ali takong kumdaaktsü, anungji taküm morok-mi adoktsü kanga mela kumdaaktsür lir.

Tang asüba ya Spain morok-mi lendong nung 2005 küm sülen tang timba alitsü. Iba küm Guadalajara province nung barbecue ka nungi mi adoka firefighter 11 asü.

Sheikh Hasina December ita linüki meyipa aotsü sentong lir

New Delhi, Chiteni/July 10 (Agencies): Bangladesh ato kilonser menden nungi atsüngdoker alila Sheikh Hasina, shiba nem lar linüki tasüba temerenshi agütsütsü obendang agüja lir, la December ita lar party nung külem tenzükertem den külemi lar linüki meyipa oa bendanga agütsütsü tebilemba lir ta Hokulbarnü osangbener dang ashi.

Hasina-i ashiba agi, la aser lar Awami League party züngsemtem, shirnok linük nung nokdanga lir, parnok pei mulungtetba nung linüki meyipa oa okadaki pei sasa aotsü sentong lir.

2024 küm kaketshir temi anir linük tesem ajunga nung hopta aika longkak aitba sülen Hasina ya yimsüsüba menden yutsütsüsa akum, koba Bangladesh puti otsü nung yimtenren tsütsü mepetmesü tulutiba akum. Lai ato kilonser ama kümsük balala nung lar linük küm 20 tenzuka aru.

November ita linük indang war-crimes court ajanga kaketshir temi anir longkak aitba tashiyim amshia azüoktsü atema totuyuba agütsü ta tai tonglokja tasüba agi merenshitsü obendang agüja liasü. Hasina-i bendang lima nung jenoker item taitüsüba magizüker.

December ita Bangladesh-i meyipa aotsü sentong sangdongba mapang, "Ni meyipa aoba mapang parnoki aputsü akok, parnoki ni tepsettsü akok," ta arishi küm 78 tain Hasina-i osangbener dang ashi.

"Ajisüaka ni aotsüla. Kü party lenirtem aser inyakerter kanga timtem nung lir. Tasüba arura, ni ozü li nung arudaktsüner, kong kü tsürabor rema lir, aser kong parnok azü lalu," ta lai ashi.

Osang balala ajanga ashiba agi, Awami League workers aika lar sorkar lapoba sülen apu, ken o benok aser teka sangshi.

Hasina-i la meyipa aotsü sentong ya Bangladesh sorkar dang ano memetetdaktsü ta ashi. "Democracy, vote

agütsütsü temeden, Awami League indang political rights aser ochi obendang ya miimshia jembitsüba onük masü," ta lai ashi.

Taoba ato kilonseri la aputsü metsübor, kechiaser la taoba mapang tepuokdak aiben yuogo ta ashi.

Longkak aitertertem lar ki tsütsü aruba ajanga la takum timtem nung lir ta angateta lai linük yutsütsüsa akum, ta Hasina-i ashi.

"Kodang sorkari kati mapang talangka inyakdir, aibelen ataloker - kecha sorkari aibelen masüba mali. Saka tajung aser tamajung bendangtsü, sorkar ka shidak aser tai bendangtsü nübur meyong. Ni obendangba nübur nem yutsür," ta ashi.

Awami League asendenshitsü atema lai Bangladesh nung parliamentary constituencies 300 aliba nungi 125 awajema online meeting tem menogo ta lai ashi.

"Parnoki ni aitsür alitsü, aser ni election nung metokteptettsü. Saka kechiba parnoki Awami League shibangtsü? Onoki majung inyaka lira, nüburtem nem lemtetdakjang," ta Hasina-i ashi.

2024 küm kaketshir temi anir sorkar anema longkak aitba ajanga lai ato kilonser ama kümsük balala nung küm 20 yimsü süa aruba tembanga Bangladesh nungi Hasina ajen. November ita Bangladesh indang International Crimes Tribunal ajanga longkak aiter tepseta azüokba atema la meliaka tsüba temerenshi agütsütsü obendang agüja liasü. Hasina-i item taitüsüba magizük aser la atsüngdokba sülen India nung jenoka alir.

La linüki meyipa aotsü sentong aliba ya ajanga Bangladesh yimtenren tsütsü mepetmesü tali ang akumtsü amai ajiteter, kong küm ana jungnüa yimten yimsüsüba tsütsü mepetmesü adoka aruba sülen tang aliba interim sorkari tensa azüoktsü meranger.

(Maneni tapak 8 nung...)

GOVERNMENT OF NAGALAND

DIRECTORATE OF HIGHER EDUCATION

NAGALAND: KOHIMA

Website: www.highereducation.nagaland.gov.in Email: dirhighedu@gmail.com

NO.HED/SCHO/MISC/36/2025

Kohima, dated the 10th July 2026

NOTIFICATION

This is for information to all students, parents, and educational institutions that the National Scholarship Portal (NSP) and the Common Scholarship Portal (CSP) are official government platforms for scholarship applications, accessible to all eligible applicants. **No individual, centre, or organisation/society has been authorised to exclusively collect or process scholarship applications.**

Applications are submitted online by students, verified by the Institution Nodal Officer (INO) of the concerned institution, and further verified at district/state level. The INO must be a regular employee of the institution. Any institution that appoints or engages an outsider as INO shall be held solely accountable and liable for all consequences arising therefrom. Applicants must upload only genuine documents issued by competent authorities. Submission of false or fabricated documents will result in rejection and may invite legal action.

All are advised to remain vigilant against misinformation and fraudulent claims. The scholarship process must remain free, fair, and transparent.

SD/-
Director
Higher Education
Nagaland: Kohima

GOVERNMENT OF NAGALAND

DIRECTORATE OF HEALTH & FAMILY WELFARE

NAGALAND :: KOHIMA

No. DHFW-5/Trg/PG (Dental)/2008-09/4851-53/

Dated, Kohima the 10th July 2026

ADVERTISEMENT

As per Government Approval Vide Order No.HFW(A)-10/8/16/181 Kohima, dated the 8th July, 2026. Applications are invited for sponsored candidate(s) from Nagaland (preference will be given to in-service doctors) to undergo 3 (three) years Post- Graduate course in **MDS "Orthodontics & Dentofacial Orthopaedics"** for the academic session 2026-27 at Regional Dental College, Guwahati.

- Criteria :

1. Candidates should be domicile of Nagaland State.
2. Candidate should be qualified in the **NEET-MDS-2026**.
3. If the 1st Candidate refuses to join the course for any reason, he/she should surrender the seat in writing. In that case, the offer of the seat will go to the next waiting list candidate.
4. **No. of seat - 1 (one).**

Interested candidates may apply to the undersigned, DHFW-5 (Training Section) on or before 16th July 2026.

SD/-
(DR. MERENINLA SENLEM)
Principal Director
Directorate of Health & Family Welfare
Nagaland: Kohima.

Z-28015/45/2025-PMSSY-IV(8323809)

Government of India

Ministry of Health & Family Welfare (PMSSY Division)

Room No. 12100, Kartavya Bhawan-1,
New Delhi-110001

Ministry of Health & Family Welfare (PMSSY Division)-i Level-13 (Rs.123100-215900) (as per 7th CPC) nung transfer mesüra deputation yimya nung Awantipora (Jammu and Kashmir) aser Darbhanga (Bihar) nung aliba AIIMS nung Deputy Director (Administration) post atema temsüa aliba candidates nungi applications meshir.

2. Osang tejangja atema Ministry & iba Division indang Website i.e. <https://www.mohfw.gov.in> aser <https://pmssy.mohfw.gov.in> nung reprangtsü akok.

3. Advertisement tejangja Employment News nung adoktsütsü. Applications ya iba advertisement Employment News nung adoktsür anogo 45 tashi agizüktsü.

Deputy Secretary
Tel. 011-24013197/98

CBC - 17101/11/0013/2627

FIFA World Cup 2026: France-i Morocco tsükdakja semi-finals tongogo

Foxborough, Chiteni/July 10 (Agencies): Brehostibarnü France captain Kylian Mbappe-i penalty ka meyoktet saka iba sülen goal tajung ka yokteta France-i minute trok tsüngta goal ana agütsü Morocco madak 2-0 agi takok ngua World Cup semi-finals tongogo.

Mbappe, shiba arishi küm 27 tain lir, pa World Cup asaya 20 nung asayar tanubutisang kumogo aser pai box telung nungi goal ka ya agütsüteta pa asoshi World Cup nung goal 20 buba yoktet aser minute trok lir Ousmane Dembele-ia goal ka yokteta semi-finals nung Belgium mesüra Spain den asayatsü jenjang alangzük.

Mbappe ya taküm iba asayamung nung goal timtiba agütsür tematiba jenjang nung Lionel Messi den külemi kasa goal ti agütsür lir, aser World Cup all-time scoring list nung pai goal ka agi dang Argentina nungba memenepi lir.

"Ibai tanen makai semi-finals asem asütsü. Ibai yimya ka ama kumogo, saka nü mapa ano meinyakma. Penalty metsüba nung Kylian dak kodanga temulung malemtsüsa meliasü," ta France coach Didier Deschamps-i ashi.

"Ajisüaka onok kechi tongner, aji tongogo. Tanü onoki ano mera ka tejangleni

agiogo aser final four nung ano maneni asayatsü," ta Deschamps-i ashi, shibai asaya tatemlen Mbappe ya tetsüng temobu atsükba mechi melendakja liasü.

Iba asaya ya 2022 World Cup semi-final tanaben asayar ama liasü, kong France-i Morocco madak 2-0 agi takok ngua final atong. France tang tashi knockout matches asem nung goal kata machi lir, aser Morocco kanga meranga asaya saka Ismael Saibari yiruba mechi tapok adokba kanga jangja liasü aser minute 84 matong tashi target nung ball meyokteti liasü.

"Onok kanga tezü atanger, onoki takok ngunüa liasü. France ya team tajung aser asayar tajung lir ta agizüker. Goal agütsütsü maongka France-i tajungba angu. Onok tera anüalemer liasü aser iba tamakok agizüker," ta Morocco coach Mohamed Ouahbi-i ashi.

"Tanü France tashi taitba liasü saka onoki tokteptet aser terenlok liasü aser küm pezü tsüngta parnok tsükdaktsütsü," ta Ouahbi-i ashi. 2030 World Cup ya Morocco, Spain aser Portugal nung asayatsü.

France ya World Cup finals asem nung ashidena asayar linük asem buba akumtsü meranga asaya tetenzüklen

nungi kanga junga asaya.

Mbappe ya France nunger World Cup matches timtiba nung asayar Hugo Lloris den sako kumogo, aser pai asaya tetenzüklen goal agütsütsü maongka angu saka Morocco keeper Yassine Bounou-i nokdangtet.

Minute 28 buba nung France-i penalty ka angu saka Mbappe-i metsüba Bounou-i ayong-ayonga soita ayu. Ibai Mbappe asoshi Euro 2020 sülen national team nung penalty miss asüba mezüngbuba alitsü.

Taküm iba asayamung akoktsü teimla aliba France nungi Lucas Digne-i first-half atongtsü anasa meta talang nungi metsüoktsüba crossbar nung tsükdaka liasü, aser Morocco nunger defensive asayaba ajanga French box tonga ball bener alutsü kanga tim atem aser first-half nung khen danga goal yoktsü memerang.

Mbappe-i penalty meyoktetba kepzüka minute 60 buba nung yoktet aser Morocco shia marudang Dembele-i ano goal ka yoktet.

Ibai Dembele asoshi taküm asayamung nung goal pongu buba alitsü.

"Ano talangka aotsü lir, aser tejakdang aliba ya tesashiba, saka onok junga arutsü," ta Mbappe-i ashi.

FIFA World Cup 2026 mechi Bangladesh nung nisung 12 süogo

Dhaka, Chiteni/July 10 (Agencies): Bangladesh ya FIFA World Cup kata nunga asayadanga mali, ajisüaka küm pezü shia iba linük nung nüburtemi süoshi sentsü tenenya aser tamak mesüra tanen aser temesüng asemer agi asünger.

Football yagi küm aika Bangladesh aser kidanger West Bengal nung nisung million aika tzüratemdakja arur. Arütsü anatsülen iba saisapong repranger jenti lir, ajisüaka Bangladesh nung football jangraba yabo khenyongi balaka lir.

Iba linük ya FIFA World Cup atema kodanga qualify mesüaka taküm iba asayamung mapang fans tem raratepba, kotari agi atsüngba, züksetba mesüra football benjongdang tia maka ajurua asüba ajangshia arutagi.

Tang tesüsa asüba ya Nilphamari's Jaldhaka upazila nung Uttar Cheranga yimtsüng nungi arishi küm 38 tain Mohammad Shariful Islam alitsü, shiba mapa bushia ita ti shi tejakdang Cumilla-i ao.

Pa ya e-rickshaw anir ka liasü aser television nung Argentina aser Egypt asaya

reprangba mapang tilateri nung mangatettep adoka zükset ta ashir.

Bushisüngdanger temi ashiba agi, Islam ya asaya mapang yangji aliba lanur kar den tebang agi asatepa liasü. Ajisüaka kanga keraa azüdokshi aser pa mapang tatsüka lir iba rongrongshirong mapang yiruba zübu ajanga asü.

Iba mepetmesü ya Cumilla indang Adarsha Sadar upazila kübok Dhanpur nung Mohsin Mia indang dokan nung Mongulbar aonung ayatirm tongli atalok.

"Komasür nisungtemi football match ka mechi nisung kar tepsettsü? Ni jala ana lir. Tang parnoki shiba dang tebu ajatsü? Ozü jala ana lajar kumogo. Kü kinungbo tepseter nem temerenshi tesashitiba agütsüdaktsüner," ta pa kinungtsü Beauty Begum-i nüktzü yima ashi.

Ajisüaka Bangladesh nung World Cup mapang iba ama tia ajuruba ya Shariful Islam kisüng masü.

June 29 nü Brazil aser Japan asayaba mapang Ashulia nung mangatettep adoka arishi küm 15 tain Nahid Hasan kotari agi

tsüngset. Par kinungeri ashiba agi, Brazil bhukumer nisung pezü arua pa par kidang nungi mesüzüka anir ao aser tepseter pa tasü mang ya lisem nung rema yutsü.

Ano anogo ana lir July 1 nü Brazil aser Japan asaya dak sendakba nung mangatettep adokba sülen Dhaka kübok Adabor tesem nung arishi küm 30 tain BNP lenir Abul Bashar Badshah lepset. Yangji alirtemi mangatettep bentettsü mokoki tensa tamajungba akum ta ashir. Külem BNP activist Saddam Hossain iba lendong nung kanga sashia yiru.

Asürtem ajakbo telok balala tsüngta raratepba ajanga masü.

Tesem balala nung nisung asem pei sapuba team indang nisan asongdang light agi puseta asü.

School azünger Mahin Sheikh ya Mymensingh kübok Gafargaon tesem nung June 19 nü Brazil indang nisan asongdang light nung puseta asü. Ramhari Baishnab ya Chattogram nung June 15 nü Argentina nisan asongdang asü aser June 9 nü Faisal ya Manikganj nung Brazil nunger nisan asongdang puseta asü.

				
TESÜSABA ASAYA OSANG				
France	2	0	Morocco	
QUARTER-FINALS				
July 11	12:30 AM	Spain	VS	Belgium
July 12	2:30 AM	Norway	VS	England
July 12	6:30 AM	Argentina	VS	Switzerland

CWG 2026: Sports Ministry-i Indian contingent 191 agizükogo

New Delhi, Chiteni/July 10 (Agencies): Hokulbarnü Sports Ministry-i Glasgow nung July 23 nungi tenzüktsü aliba Commonwealth Games atema züngsem 191 aliba Indian contingent agizükogo.

Contingent nungya saisaponger 126 aser team ketdangsür 51 alitsü. Ajisüaka Ministry-i Indian Olympic Association indang Executive Committee nung züngsem shima aliba ketdangsüri indokba senotsü memonoktsü ta jangja-jangja shiogo.

Sangdong nungsa contingent indang performance osang tejangja den action photographs tem Ministry nem India-i meyipa shilanger anogo 30 tsüngta agütsütsü shia liasü. India nunger saisaponger 126 nungya tebur 78 aser tetsür 48 alitsü.

"Nisung shiba südir süaka pa/ la IOA indang EX nung elected position nung lira, NSF mesüra sports body mashi, shir tenüng team officials list nung inoka lir, parnok atema sorkari senotsü magütsütsü ta IOA-i metettsüla,"

ta Ministry ajanga ashi.

Ministry-i team officials nungya coaches, support staff, medical staff aser contingent ketdangsürtem alitsü ta tejangja ashi. Contingent staff nungi Chef de Mission Rohit Rajpal kisting IOA Executive Committee nung züngsem lir. Ministry totuyuba ya shidak inyakra, pa Glasgow nung amungba sen sorkari magütsütsü.

Tesüiba mapang ketdangsür/ saisaponger kar bendang lima nung samaba mechi National Sports Federation-i pei contingents indang tera jungjunga bushitsüla, ta Ministry-i ashi.

Senotsü indokba asadanger Glasgow edition atema Commonwealth Games nung saisapong aika züdokogo. Item rongnung shooting, hockey, badminton, wrestling aser cricket dena lir.

Glasgow Games nung temang shidak alir atema saisapong ter aser para sports trok kisüng alitsü. India ya temang shidak alir indang saisapong toku aser para spors pongu nung shilem agütsü.

BENDANGLI OSANG : Tapak 7 nungi...

Sheikh Hasina December ita...

Iba yagi Dhaka aser New Delhi tesendaktep nung kongshitsü akok, koba India-i taoba ato kilonser jenoka alitsü melaba sülen mejungi lir.

Bangladesh-i aiben India dang Hasina yoktsü asüngdanga liasü.

La linük yutsür jena aoba sülen osangbener den mezüng sensaksemba mapang, la meyipa aotsü atema bendanger sorkar kata dena sensaksem masü ta Hasina-i ashi.

La meyipa aotsü telemtetba agiba ibai mezüng masü.

"Dhaka nung aliba ketdangsür temi ni meyipa anir oner, parnoki ni meyipa yoktsü atema India dangi shiti aiben züluogo. Ni kūsasa aotsü," ta Hasina-i ashi.

April ita India indang Ministry of External Affairs ajanga Bangladesh indang 'extradition request' asadanger aser sorkar tasenba den tajunglen nungi ajurutepa linük ana tsüngta tesendaktep nung tashi inshiner, ta shia liasü.

1975 küm mitkari tashiyim

amshia sorkar atsüngdokba mapang Hasina tebu Sheikh Mujibur Rahman, linük kumtetba nung lenir, aser lar kinunger timba tepsetba sülen Bangladesh yimtenren nung la ya nübu tejangja ka ama lia aru.

1981 küm bendang lima nung jenoka aliba nungi meyipa shilangba sülen mitkar anema nokdakba movement nung la tejangja nübu ka akum aser democracy bhukuma nokdakba mapang aiben apu.

2007 küm la ya ochimashi ken o nung mitkari yariba caretaker government kati tepuokdak ayu aser chiokba sülen 2008 election nung takok tulu ngua yimsüsüba mendeni atu.

Bangladesh rongsenketzüng melenshitsüba asoshi Hasina tenüng asanger, saka lar sorkari parnok anemer ajemrepa ayu aser democratic institutions tashi mait kumdahtsü ta aitsür, koba lai magizüker.

UN report ka nung, 2024 küm kaketshir temi anir longkak aitba azüokdang nisung 1,400 shi asü, ta ashir.

BILEMDANGANG

"Timla tasen nung mera tasen agiang."